

四庫全書

集部

欽定四庫全書

集部

文章辨體彙選卷五百五十七
九至

詳校官中書_臣李采

主事銜_臣徐以坤覆勘

總校官檢討_臣何思鈞

校對官中書_臣石鴻蕭

謄錄監生_臣史廷藻

欽定四庫全書

文章辨體彙選卷五百五十七

明 賀復徵 編

世譜一

劉勰曰譜者普也注序世統事資周普鄭氏譜詩蓋取乎此復徵曰按譜布列也物有紛錯而不一者則布列之使有可考也而次第一人所履亦謂之譜

歐陽族譜

宋歐陽修

歐陽氏之先本出於夏禹之苗裔自帝少康封其庶子
於會稽使守禹祀歷夏商周以世相傳至於允常子曰
句踐是為越王越王句踐傳五世至王無疆為楚威王
所滅其諸族子分散爭立皆受封於楚而無疆之子蹄
封於烏程歐餘山之陽為歐陽亭侯其後子孫遂以為
氏當漢之初有仕為涿郡太守者子孫遂居於北或居
青州之千乘或居冀州之渤海千乘之顯者曰生字和
伯為漢博士以經名家所謂歐陽尚書者是也渤海之

顯者曰建字堅石所謂渤海赫赫歐陽堅石者是也建
遇趙王倫之亂見殺其兄子質以其族南奔居於長沙
其七世孫曰景達仕於齊不顯至其子顧顧子紇仕於
陳紇子詢詢子通仕於唐四世有聞遂顯自通三世生
琮為吉州刺史子孫因家於吉州自琮八世生萬又為
吉州安福令其後世或居安福或居廬陵或居吉水而
修之皇祖始居沙溪至和二年分吉水置永豐縣而沙
溪分屬永豐今譜雖著廬陵而實為吉水永豐人也蓋

自亭侯蹄因封命氏自別於越其後子孫散亡不可悉紀其可紀者千乘渤海而已千乘之族自生傳八世至歙子復無後世絕經不傳家其他子孫亦皆微弱遂不復見而渤海之後獨見於今然中間失其世次者再蓋自質奔長沙至於景達七世而始見自琮至於安福府君又八世而始見其後遂不絕安福府君之九世孫曰修當皇祐至和之間以其家之舊譜問於庶人各得其所藏諸本以考正其同異列為世次一篇自景達以後

始得其次叙

景達

生一子

僧寶

生三子

顏

生二子

紇

生四子

詢

亮

德

器

約

生一子

肩

盛

闕

遂

闕

詢

生四子

長卿

闕

肅

生一子

倫

闕

通

生二子

幼明

生一子

昶

生二子

環

琮

幼讓

闕

自琮已下譜亡至其八世孫曰萬始復見於譜

萬

生一子名某

生一子

雅

生二子

效

生三子

謨

亡

託

遠

楚

生三子
二名亡

某

某

戌

託生三子

鄴闕

柳生八子
俊生一子

翱生一子
葛

伸生一子

宏生二子
至

起

儀

生四子

猛

生二子

麗

綬

谷

生二子

煥

炳

寬

生五子

曦

暉

見

曉

煦

載生一子 罍

伍生一子 素生三子 霈

曉

藹

信生一子 端無子

偃生三子 觀生二子 𦣻

修

旦 生二子
宗古

宗道

晄 生三子
宗顏

宗閔

宗孟

仝 生二子
翦 生三子
暹

顓

勲

羽 無子

倣 生三子

穎 生二子 景

昱

顓 生一子
名亡

頊 生一子
名亡

邦 闕

惟歐陽氏自得姓以來子孫衆多而譜隨親疏宜有詳

畧其上世遠而支分疏者事或具於史或各見其家譜
今自吉州府君而下其列如左

吉州府君諱琮葬袁州之萍鄉而子孫始家於吉州當
唐之末黃巢攻陷州縣府君率州人扞賊鄉里賴以保
全至今人稱其德

安福府君諱萬事迹闕

處士諱雅字正言高年不仕德行稱於鄉里夫人龍氏
韶陽府君諱效字德用為韶州韶陽主簿夫人周氏

處士諱託字達明隱德不仕鄉里稱之凡民有爭決之官府者後多復訴訟有從處士平其曲直者遂不復爭夫人王氏

令公府君諱柳字可封仕南唐為武昌令吉州軍事衙推官至檢校右散騎常侍兼御史大夫性至孝兄弟相友愛有紫芝一莖兩葩生於楹鄉人以為孝道所感為著賦頌享年九十有四葬歐桂里橫溪保之鷺湖夫人劉氏府君累贈金紫光祿大夫太師中書令夫人累封

楚國太夫人

屯田府君諱俊仕南唐為洪州屯田院判官享年五十
七葬溧源夫人李氏

處士諱紳守道不仕享年七十有三葬滁陂夫人蕭氏
屯田府君諱儀字象之仕南唐舉進士及第官至屯田
郎中府君之登進士第也父母皆在鄉里榮之乃改廬
陵之文霸鄉安德里為儒林鄉歐桂里其所居之履順
坊為具慶坊享年五十有五葬官山夫人王氏

處士諱伍守道不仕夫人王氏張氏

靜江府君諱信仕南唐為靜江軍團練使享年二十有五葬曾家庄夫人郭氏

令公府君諱偃少以文學著稱南唐耻從進士舉乃詣文理院上書獻其所為文十餘萬言召試為南京街院判官享年三十八葬吉水之回陂夫人李氏府君累贈金紫光祿大夫太師中書令兼尚書令夫人累封吳國太夫人

處士諱佺晦迹不仕享年四十有七葬東田夫人陸氏
工部府君諱倣仕皇朝為許田令葬奉新累贈工部侍
郎夫人李氏

處士諱翱事迹闕

處士諱宏事迹闕

處士諱猛葬馬家坑夫人鄭氏

水部府君諱谷為筠州團練副使官至檢校水部員外
郎葬傳家坑夫人王氏

封州府君諱寬為封州司理參軍葬早禾坑夫人邊氏
工部府君諱載字則之淳化三年進士及第歐陽氏自
江南歸朝以進士登科者自府君始為人方重寡言真
宗皇帝嘗自擇御史府君以秘書丞拜監察御史後知
泗州毀龜山佛寺誅妖僧數十人為政清廉簡靜所至
官舍不窺園圃至果爛墮地家人無敢拾者官至尚書
工部郎中享年六十有八夫人金壇縣君朱氏
處士諱素事迹闕

處士諱端事迹闕

崇公諱觀字仲賓事具瀧岡阡表享年五十有九葬吉水沙溪之瀧岡累贈金紫光祿大夫太師中書令兼尚書令追封崇國公夫人彭城郡太君鄭氏累封魏國太夫人享年七十有二附葬瀧岡

處士諱旦隱德不仕事母以孝為鄉里所稱葬烏龜塘夫人彭氏

兵部府君諱睦字日華咸平三年進士及第官至都官

員外郎歷知桂陽監瑞黃永三州所至有能稱尤長於
決疑獄所得俸祿分養遺孤其兄之子修少孤教之如
己子享年七十有九葬安州應城之彭樂村夫人福昌
縣君范氏其後兄子修者以參知政事遇今上登極恩
贈府君兵部員外郎

處士諱翦事迹闕

處士諱羽事迹闕

職方府君諱穎字孝叔咸平三年進士及第官至尚書

職方郎中歷知萬峽歙彭鄂岳閬饒八州為政務嚴明
有威惠以本官分司享年七十有三家於荆南遂葬焉
夫人廣陵縣君曾氏

奉職府君諱顥為三班奉職

殿直府君諱頊為右班殿直

蘇氏族譜 蘇洵

蘇氏之譜譜蘇氏之族也蘇氏出自高陽而蔓延於天
下唐神龍初長史味道刺眉州卒於官一子留於眉眉

之有蘇氏自是始而譜不及焉者親盡也親盡則曷為
不及譜為親作也凡子得書而孫不得書何也以著代
也自吾之父以至吾之高祖仕不仕娶某氏享年幾某
日卒皆書而他書何也詳吾之所自出也自吾之父
以至吾之高祖皆曰諱某而他則遂名之何也尊吾之
所自出也譜為蘇氏作而獨吾之所自出得詳與尊何
也譜吾作也嗚呼觀吾之譜者孝弟之心可以油然而
生矣情見乎親親見於服服始於衰而至於總麻而至

於無服無服則親盡親盡則情盡情盡則喜不慶憂不
弔喜不慶憂不弔則塗人也吾之所以相視如塗人者
其初兄弟也兄弟其初一人之身也悲夫一人之身分
而至於塗人此吾譜之所以作也其意曰分而至於塗
人者勢也勢吾無如之何也已幸其未至於塗人也使
之無至於忽忘焉可也嗚呼觀吾之譜者其孝弟之心
可以油然而生矣

蘇氏諱鉞不仕娶黃氏享年若干七月二十六日卒

子祈

無嗣

子福

子宗覺

子昭鳳

子惟讚

子垂象

子垂正

子垂範

子惟善
子垂則

子昭慶
子惟德
子瑤

子昭文
子渭
子瑗

子沆

子浩

子漸

子洙

子宗藝 無嗣

子宗瓊 無嗣

子禮 子暄 子昭翰 子文質 子士元

子文圭 子士能

子士良

子士寧

子士嘉

子士宗

子駿

子昭遇

無嗣

子昭遠

無嗣

子昭逸

無嗣

子昭建

無嗣

子陳

無嗣

子祐 子宗靄 子昭玘 子文實 子惟忠

子惟恭

子文寶 無嗣

子昭現 子文采 子士祥

子宗著 子德謙 子永

子諱祐 子宗善 子昭圖 子惟益 子允元

不仕娶李氏享年五 子允滋

十四七月三十日卒

子惟吉 無嗣

子昭越 無嗣

子宗晏 子昭

子宗昇 子德榮 子哲 子珪

子瑜

子德升 子淳 子舟

子德元 子汶

子諱杲 子諱序 子澹 子位

不仕娶宋仕至大理
氏享年五評事娶史

子侑

十一月六日氏享年七十八日卒
子渙

十五日卒
子洵

子宗晁 無嗣

子德 子子勲 子慎言 子慶昌

子復圭

子澄

蘇氏之先出於高陽高陽之子曰稱稱之子曰老童老童生重黎及吳回重黎為帝嚳火正曰祝融以罪誅其

後為司馬氏而其弟吳回復為火正吳回生陸終陸終生子六人長曰樊為昆吾次曰惠連為參胡次曰箴為彭祖次曰來言為會人次曰安為曹姓季曰季連為芊姓六人者皆有後其後各分為數姓昆吾始姓己氏其後為蘇顧溫董當夏之時昆吾為諸侯伯歷商而昆吾之後無聞至周有忿生為司寇能平刑以教百姓周公稱之蓋書所謂司寇蘇公者也司寇蘇公與檀伯達皆封於河世世仕周家於其封故河南河內皆有蘇氏六

國之際秦及代厲皆苗裔也至漢興而蘇氏始徙入秦或曰高祖徙天下豪傑以實關中而蘇氏遷焉其後曰建家於長安杜陵武帝時為將以擊匈奴有功封平陵侯其後世遂家於其封建生三子長曰嘉次曰武次曰賢嘉為奉車都尉其六世孫純為南陽太守生子曰章當順帝時為冀州刺史又遷為并州有功於其人其子孫遂家於道州其後至唐武后之世有味道者味道聖歷初為鳳閣侍郎以貶為眉州刺史遷為益州長史未

行而卒有子一人不能歸遂家焉自是眉始有蘇氏故
眉之蘇皆宗益州長史味道趙郡之蘇皆宗并州刺史
章扶風之蘇皆宗平陵侯建河南河內之蘇皆宗司寇
忿生而凡蘇氏皆宗昆吾樊昆吾樊宗祝融吳回蓋自
昆吾樊至司寇忿生自司寇忿生至平陵侯建自平陵
侯建至并州刺史章自并州刺史章至益州長史味道
自益州長史味道至吾之高祖其間世次皆不可紀而
洵始為族譜以紀其族屬譜之所記上至於吾之高祖

下至於吾之昆弟昆弟死而及於昆弟之子曰嗚呼高祖之上不可詳矣自吾之前而吾莫之知焉已矣自吾之後而莫之知焉則從吾譜而益廣之可以至於無窮蓋高祖之子孫家授一譜而藏之其法曰凡嫡子而後得為譜為譜者皆存其高祖而遷其高祖之父世世存其先人之譜無廢也而其不及高祖者自其得為譜者之父始而存其所宗之譜皆以吾譜冠焉其說曰此古之小宗也古者有大宗有小宗傳曰別子為祖繼別為

宗繼禰者為小宗有百世不遷之宗有五世則遷之宗
百世不遷者別子之後也宗其繼別子之所自出者百
世不遷者也宗其繼高祖者五世則遷者也別子者公
子及士之始為大夫者也別子不得禰其父自使其嫡
子後之則為大宗故曰繼別為宗族人宗之雖百世而
大宗死則為之齊衰三月其母妻亡亦然死而無子則
支子以其昭穆後之此所謂百世不遷之宗也別子之
庶子又不得禰別子而自使其嫡子為後則為小宗故

曰繼禰者為小宗小宗五世之外則易宗其繼禰者親兄弟宗之其繼祖者從兄弟宗之其繼曾祖者再從兄弟宗之其繼高祖者三從兄弟宗之死而無子則支子亦以其昭穆後之此所謂五世則遷之宗也凡今天下之人惟天子之子與始為大夫者而後可以為大宗其餘則否獨小宗之法猶可施於天下故為族譜其法皆從小宗凡吾之宗其繼高祖者高祖之嫡子祈祈死無子天下之宗法不立族人莫克以其子為之後是以繼

高祖之宗亡而虛存焉其繼曾祖者曾祖之嫡子宗善
宗善之嫡子昭圖昭圖之嫡子惟益惟益之嫡子允元
其繼祖者祖之嫡子諱序序之嫡子澹澹之嫡子位其
繼禰者禰之嫡子澹澹之嫡子位曰嗚呼始可以詳之
矣百世之後凡吾高祖之子孫得其家之譜而觀之則
為小宗得吾高祖之子孫之譜而合之而以吾譜考焉
則至於無窮而不可亂也是為譜之志云爾

蘇氏之先自昆吾以來其最顯者司寇忿生三代之事

其聞於今不詳周公作立政而特稱之以教太史其後周室衰司寇之子孫亦曰蘇公遭讒作詩以刺暴公名曰彼何人斯惟此二人見於詩書是以其傳至今自蘇氏入秦而平陵侯建典屬國武始顯遷於趙而并州刺史章益州長史味道始有聞於世遷於眉而至於今無聞夫是惟譜不立也自昆吾至書之蘇公五百有餘年自書之蘇公至詩之蘇公二百有餘年自詩之蘇公至平陵侯建典屬國武七百有餘年自平陵侯建典屬國

武至并州刺史章二百有餘年自并州刺史章至益州
長史味道五百有餘年自益州長史味道至吾之高祖
二百有餘年以三十年而易一世則七十有餘世也七
十有餘世亦容有賢不賢焉不賢者隨世磨滅不可得
而聞而賢者獨有七人七十有餘世其賢者亦容不止
此也而其餘者皆不傳則譜不立之過也故洵既為族
譜又從而記其所聞先人之行昔吾先子嘗有言曰吾
年少而亡吾先人先世之行吾不及有聞焉蓋嘗聞其

畧曰蘇氏自遷於眉而家於眉山自高祖涇則已不詳
自曾祖斬而後稍可記曾祖娶黃氏以俠氣聞於鄉里
生子五人而吾祖祐最少最賢以才幹精敏見稱生於
唐哀帝之天祐二年而歿於周世宗之顯德五年蓋與
五代相終始歿之一年而吾太祖始受命是時王氏益
氏相繼據蜀蜀之高才六人皆不肯出仕曰不足輔仕
於蜀者皆其年少輕銳之士故蜀以再亡至於太祖受
命而吾祖不及見也吾祖娶於李氏李氏唐之苗裔太

宗之子曹王明之後世曰瑜為遂州長江尉失官家於
眉之丹稜祖母嚴毅治家肅然多才畧猶有竇太后柴
氏主之遺烈生子五人其才皆不同宗善宗晏宗昇循
循無所毀譽少子宗晁輕俠難制而吾父杲最好善事
父母篤於孝與兄弟篤於愛與朋友篤於信鄉閭之人
無親疎皆愛敬之娶宋氏夫人人事上甚孝謹而御下甚
嚴生子九人而吾父獨存善治生有餘財時蜀新破其達
官爭棄其田宅以入覲吾父獨不肯取曰吾恐累吾子

孫終身田不滿二頃屋弊陋不葺也好施與曰多財而不施吾恐他人謀我然施而使人知之人將以我為好名是以施而尤惡使人知之族叔父玩嘗有重獄將就逮曰入獄而死妻子以累兄請為我詞獄之輕重輕也以肉饋我重也以菜饋我饋我以菜吾將不食而死既而得釋玩曰吾非無他兄弟可以寄生死者惟子及將歿太夫人猶執吾父手曰盍以是屬子之兄弟笑曰而子賢雖非吾兄弟亦將與之不賢雖吾兄弟亦將棄之屬

之何益善教之而已遂卒卒之歲蓋淳化五年推其生
之年則晉少帝之開運元年也此洵嘗得之先子云爾
先子諱序字仲先生於開寶六年而歿於慶歷七年娶
史氏夫人生子三人長曰澹次曰渙季則洵也先子少
孤喜為善而不好讀書晚乃為詩能白道敏捷立成凡
數十年得數千篇上自朝廷郡邑之事下至鄉閭子孫
畋漁治生之意皆見於詩觀其詩雖不工然有以知其
表裏洞達豁然偉人也性簡易無威儀薄於為己而厚

於為人與人交無貴賤皆得其歡心見士大夫曲躬盡
敬人以為諂及其見田父野老亦然然後人不以為怪
外貌雖無所不與然其中心所以輕重人者甚嚴居鄉
間出入不乘馬曰有甚老於我而行者吾乘馬無以見
之敝衣惡食處之不恥務欲以身處衆之所惡蓋不學
老子而與之合居家不治家事以家事屬諸子至族人
有事就之謀者常為盡其心反覆而不厭凶年嘗鬻其
田以濟饑者既豐人將償之曰吾自有以鬻之非爾故

也卒不肯受力為藏退之行以求不聞於世然行之既久則鄉人亦多知之以為古之隱君子莫及也以渙登朝授大理評事史氏夫人眉之大家慈仁寬厚宋氏姑甚嚴夫人常能得其歡以和族人先公十五年卒追封蓬萊縣太君洵聞之自唐之衰賢人皆隱山澤間以避五代之亂其後僭偽之國相繼亡滅聖人出而四海平一然其子孫猶不忍棄父祖之故以出仕於天下是以雖有美才莫顯於世及其教化洋溢風俗改變然後深

山窮谷之中向日子孫乃始振迅相與從官於朝然其
才氣則既已不若先人質直敦厚可以重任而無疑也
而其先人之行乃獨隱晦而不聞洵竊深懼焉於是記
其萬一而藏之家以示子孫

文章辨體彙選卷五百五十七

欽定四庫全書

文章辨體彙選卷五百五十八

明 賀復徵 編

世譜二

皮子世錄

唐皮日休

皮子之先蓋鄭公之苗裔賢大夫子皮之後在戰國及秦時無譜牒可考自漢至唐其英雄賢俊在位者往往有焉前漢時名容者以善為容官至大夫後漢時名巡

者為太醫令三國時無聞焉晉朝名初者為襄陽太守
名京者為賢處士宋朝名熙祖者與徐廣論議符王世
名審者為堅侍郎後魏世名豹子者為魏名將子道明
襲爵弟喜為使持節侍中都督秦雍梁益諸軍事大將
軍仇池鎮將假公如故喜以戰守之功累加勲爵後轉
散騎常侍安南將軍豫州刺史卒於天宗爵喜弟雙仁
冠軍將軍仇池鎮將北齊時名景和者以功大官封王
名延宗者為黃門侍郎隋朝名子信者為刺史至於吾

唐汨汨於民間無能以文取位惟從祖翁諱瑕叔舉進士有名以剛柔不合時受蜀聘為幕府累官至刺史從翁諱行修明經及第累官至項城令以盜不發貶州掾卒時日休之世以遠祖襄陽太守子孫因家襄陽之竟陵世世為襄陽人自有唐已來或農竟陵或隱鹿門皆不拘冠冕以至皮子嗚呼聖賢命世世不賤不足以立志地不卑不足以立名是知老子產於厲鄉仲尼生於闕里苟使李乾早胎老子豈降叔梁早肩仲尼不生賢

既家有不足為立大功致大化振大名者其在斯乎

許氏世譜 宋王安石

伯陽神農之後也佐堯舜有大功賜姓曰姜其後見經者四國曰申詩所謂申伯者是也曰呂書所謂呂侯者是也曰齊曰許春秋所書齊侯許男是也周衰許男嘗從大侯征伐會盟竟於春秋及後世無復國而子孫以其封姓然世傳有許由者堯以天下讓由由不受逃之箕山箕山上蓋有許由冢焉其事不見於經學者疑之

或曰由亡求於世者耳一與之天下蓋不受也故好事者以云而由與伯陽其生後先所祖同不同莫能知也漢興許氏侯者六人伯至侯盎采子侯惲嚴侯猜此三侯者其始以將封而史不書其州里平恩侯廣漢博望侯舜樂成侯延壽此三侯者同產昆弟也以外戚起於宣元之世昌邑人也盎孫昌嘗為丞相延壽及廣漢弟子嘉嘗為大司馬至王莽敗許氏始皆失其封云後漢會稽有許荆者循吏也許慎者以經術顯許俊者為易

林傳於世許楊者治鴻隙陂有德於汝南汝南之民報祭焉許靖者避地交州後入蜀先主以為太傅與從弟劭俱善論人物劭兄虔亦知名世稱平興淵有二龍焉慎俊楊靖皆汝南人也許楮者家於譙以忠力事魏封侯牟鄉許慈者家南陽入蜀父子為博士司馬晉時有許攻者東陽人也德行高察孝廉不起老於家其子日生亦有至性焉初許氏爵邑於周子孫播散四方有紀者猶不乏焉至昌邑始大著聞興於汝南其後祖高陽

者為最盛然高陽之族不見其所始有據者仕魏歷校尉郡守生允為鎮北將軍允三子皆仕司馬晉奇司隸校尉猛幽州刺史奇子遐侍中猛子式平原太守自允至式皆知名允後五世詢司馬晉嘗召官之不起詢孫珪為旌陽太守於齊珪生勇慧齊太子家令勇慧生懋篤學以孝聞卒於梁為中庶子懋生亨為陳衛尉卿嘗領史官次齊梁時事有子善心為之卒業是時有許紹者善心族父也通守夷陵治有恩流戶自歸數十萬卒

有勞於唐爵安陸郡公圉師欽寂欽明其後也圉師紹
少子寬博有器幹別自封平恩侯與敬宗俱為龍朔中
宰相欽寂謂紹曾大父也萬歲中帥師當契丹為所敗
執以如安東使說守者降至安東曰賊今且破滅公勉
守無忘忠也契丹即殺之是歲弟欽明亦遇殺欽明為
涼州都督案行卒與突厥遇亦執使降至靈州顧為
度言告守者所以破賊兄弟將兵一旦同以身殉邊鄙
賢者榮之敬宗者善心子也始以公開郡於高陽與其

孫令伯以文稱當世天寶之亂敬宗有孫曰遠與張巡以睢陽抗賊自以不及巡推巡為將而親為之下久之食已盡煮茶紙以食猶堅守賊所以不得南向以睢陽獎其鋒也卒與俱死者皆天下豪傑義士云唐亡遠孫儒不義朱梁自雍州入於江南終身不出焉儒生稠沈毅有信仕江南李氏參德化軍事稠生規好道家言不以事自恩嘗羈旅宣歙間聞旁舍呻呼就之曰我某郡人也察君長者且死願以骸骨屬君因指橐中黃金十

斤曰以是交長者規許諾敬負其骨千里并黃金置死者家家大驚愧之因請獻金如亡兒言以為許君壽規不顧竟去於是聞者滋以規為長者卒葬池州後以子顧贈大理評事生遂逖廻三子遂善事母里母勵其子輒曰汝獨不慚許伯通乎祥符中天子有事於太山加恩羣臣遂當遷讓其兄遂天子以遂試將作監主簿遂子俞字堯言名能文章大臣累薦之有與不合者官以故不遂嘗知興國軍大冶縣縣人至今稱之俞兩子均

均為進士逖字景山嘗上書江南李氏李氏歎奇之以為崇文館校書郎歲終拜監察御史後復上書太宗論邊事宰相趙普奇其意以為與己合知興元府起鄼侯廢堰以利民治澧荆揚三州為盜者逃而去其事兄如事父使妻事其長姒如事母故人無後為嫁其女如己子有子五人恂黃州錄事叅軍恢尚書虞部員外郎怡今為太子中舍簽書淮南節度使判官廳公事元今為江淮荆湖兩浙制置發運使平泰州海陵縣主簿五人

者咸孝友如其先人故士大夫論孝友者歸許氏以國子博士發運判官七年遂為其使待制天章閣自天子大臣莫不以為材其勞烈方在史氏記余故不論而著其家行云廻字光遠其事母如伯通之孝事其兄如景山之為弟也慷慨有大意少嘗仕李氏後不復仕與其兄俱葬顏村有子曾為進士方壯時亦慨然好議天下事今為大廟齋郎臨川王某曰余譜許氏自據以下其緒傳始顯焉然自許男見於周其後數封而可紀之

子孫多焉考是論之夫伯夷之所以佐其君治民余讀書未嘗不喟然歎思之也傳曰盛德者必百世祀若伯夷者蓋庶幾焉彼其後世忠孝之良亦使之遭時沐浴舜禹之間以盡其材而與夫夔臯熊虎之徒俱出而馳焉其孰能概之耶

先君平厓府君系畧

明許應元

先君名某字時久其先順天東安人曾祖誠領宣德丙午順天鄉薦授山西按察知事丁內艱起復松江府經

歷性剛直有古氣操以言事不能阿順太守旨遂至交
惡聞奏皆貶秩而經歷左遷蘭谿典史九年奏課道錢
塘視最簿太息曰吾幸不以他途進祿仕餘十年而不
得與九等階為縣尉此豈資地不足耶顧吾道不能為
姁嫗者曩自行在趨三晉道齊魯涉江淮入吳會視天
下奇勝無愈此者吾不復挽黃綬趨使者庭矣於是上
計簿定居焉而許氏為錢塘人蘭谿府君生貞裕府君
九臯貞裕府君篤孝蘭谿公卒未卜藏地寓棺柳州寺

中柳州寺故多寓棺府君苦處羣樁間哭朝夕比克塋
乃輟哭歸貞裕府君生兩湖府君諱紳是為先君之顯
考仁厚長者有信誼妣郁氏番禺主簿誠之女以辛丑
六月十九日生先君於鄉義里第先君生不凡有成人
之度長好學博通記籍屬文有思致補縣博士弟子涵
道振濂雅行冲厚鬱然有稱望矣時督學使者海陵徐
君內江劉君皆號知名士雅禮敬先君考常上寘然顧
不利選舉先君以為經莫大於易而學者之師諄而言

囑也作易微聖莫幾於道學而聞者謾其文以馳舛作
真儒論士莫謹於節行作士誠行莫先於孝弟作家範
曰吾不敢以加世之人庶幾以迪吾子也為諸生廩食
二十年年且五十矣然竟不第也喟然歎曰生明盛時
綴學待問冀有所見於世而屢為有司所黜此命也今
老矣不能持尺寸之管與少年競進取遂抗志辭謝督
學崇陽汪君慰勉之謂即厭科程然歲一貢士次序且
及子奈何不黽勉旦夕冀一命先君曰雖然意決矣終

不能復就諸生列退謂不肖孤應元曰學希古仕行志
吾家世以儒顯而我不得侍先大夫以祿養此吾所以
恨也尚干祿為雖然小子勉之無墜先志明年壬辰而
不肖孤應元舉進士是年冬先君至京師申飭小子毋
務進趨廢志學毋崇勢利怠修德即為名流愈大官不
啻倍蓰癸巳應元除守泰安奉先君泰安己未調泰州
先君歸錢塘九月感風痺疾十二月迎侍泰州明年丙
申四月二十四日卒於泰州官舍年僅五十六爾嗚呼

痛哉配夫人陳氏簪纓族也生子存者四丈夫子二長
即應元次應亨東安學生女子二長適徐繼宗次適王
應奎皆太學生孫男女二男曰暘孫女曰蘭孫應元不
即死將以年月日塋先君於青龍山之陽從先兆也先
君性仁孝初兩湖府君從仲兄秋官大夫仕裕州先君
年十二三奉郁夫人家居無僕妾之奉外勤薪水內怡
顏色無不如郁夫人意而勤學好問卒成就為通儒兩
湖府君尚交道朋好過從先君同意嚮治具盡力不使

知不足狀重傷其意及府君感痿病在衽席期月先君不解帶日夜候起臥掖負之身視厠牕惟謹郁夫人卒毀頓幾絕者數矣哀號感動隣里隣里為之廢食事季父兩山先生有恩禮以其老也在泰安時特歸省之涕泣治歛具畢脩一弟愛之篤然時時教戒之及應元仕有祿謂應元曰汝幸有位然非先人厚遺何以及此吾季父老及汝之叔父皆貧也應元曰諾於是分俸皆三之一先君之女弟歸王氏早寡先君見必泣數行命應

元奉之終身及疾病執應元手曰事叔父如事父事姑如事母慎無忘吾所志矣應元涕泣曰敢不盡力嗚呼猶在耳也忍言哉忍言哉夫人陳氏之舅鍾君年且八十喪其子無所歸先君養之終身年九十二後先君二年乃考終其重倫理好義素所敦念也不喜飲酒然對客坐談盡日夜終無罷倚意與人言披示悃素畧盡要不失忠孝大節也居貧顧不惜財用以是屢空對妻子燕笑終日晏如也遇童僕寬博有恩然教子嚴謂應元

等曰士入奉父兄之教出則資朋友之益然慎擇友矣
應元輩以故不敢妄有所與卒相磨礪期不失節者先
君之教也先君既訕意不得仕而時有天下之志仁九
族賑孤窮不內視其私有無與羣從昆弟燕游常和洽
肅穆人無間言然內外諸子嚴憚之即有過縮慙不敢
見即見正色臨之終不言稍稍就禮法乃止降色已而
嘻曰為子弟不當如是耶其和而毅如此為人魁岸豐
俊不甚為容止無城府較計即有橫逆不屑也人以此

樂親就比卒無問識不識咸流涕焉所謂樂易君子魁
梧大人者哉嗚呼忍言哉忍言哉不肖孤輩雖號天踴
地萬死無補毫毛顧以為得大人君子一言以信來世
永幽宅俾純懿不至泯泯庶幾罪逆可贖萬一爰雪涕
述大畧敢告左右惟幸哀憐之

文章辨體彙選卷五百五十八

欽定四庫全書

文章辨體彙選卷五百五十九

明 賀復徵 編

年譜

東坡先生年譜 宋王宗稷

仁宗皇帝景祐三年丙子十二月十九日乙卯時先生
生實仁宗即位之十一年也按先生送沈達詩云嗟我
與君皆丙子又按玉局文云十二月十九日東坡生日

置酒赤壁磯上又按志林云退之以磨蝎為身宮而僕以磨蝎為命宮若以磨蝎為命推之則為知時生議者以先生十二月為辛丑月十九日為癸亥日丙子癸亥水向東流故才氣汗漫而澄清子午相刑晚年多難東坡志林云韓退之詩我生之辰月宿南斗乃知退之以磨蝎為身宮僕以磨蝎為命宮平生多得謗譽殆同病也

慶歷二年壬午先生七歲知讀書按先生長短句集洞

仙歌自序云僕七歲時見眉州老尼姓朱年九十餘能
知孟昶宮中事又考冷齋夜話載先生云某七八歲時
嘗夢游陝右

三年癸未先生八歲入小學按先生作范文正公文集
序云慶厯三年某始入鄉校士有自京師來以魯人石
守道慶厯聖德詩示鄉先生某從旁竊觀問先生十一
人何人也先生曰童子何用知之某曰此天人也耶則
不敢知若亦人耳何為其不可

五年乙酉先生年十歲按子由作先生墓志云公生十年而先君宦游四方太夫人親授以書問古今成敗輒能語其要太夫人讀東漢史至范滂傳慨然太息公侍側曰某若為滂夫人亦許之否乎夫人曰汝能為滂吾顧不能為滂毋耶又按大全集載東坡少時語云秦少章言東坡十來歲老蘇曾令作夏侯太初論有人能碎千金之璧不能無失聲於破釜能搏猛虎不能無變色於蜂蠆之語又按趙德麟所編侯鯖錄云東坡年十歲

見老蘇誦歐陽謝宣召赴學士院仍謝賜對衣金帶及馬表老蘇令坡擬之其間有匪伊垂之帶有餘非敢後也馬不進老蘇喜曰此子他日當自用之

七年丁亥先生年十二按先生所作天石硯銘曰某年十二時於所居紗縠行宅隙地中與羣兒鑿地為戲得異石鏗然扣之有聲

皇祐四年壬辰先生年十七按長短句滿庭芳序云余年十七始與劉仲達往來於眉山

至和元年甲午先生年十九始娶眉山青神王方女按先生作王氏墓志云生十有九歲而歸於某至治平二年而王氏卒

二年乙未先生年二十游成都謁張安道按先生作樂全先生文集序云某年二十以諸生見公成都一見待以國士有鼂美叔是年求交先生按送美叔詩云我生二十無朋儔當時四海一子由君來扣門若有求卓吾子曰今人五六十歲尚不知要朋友先生甫二十才畢

姻便苦無朋儔何太性急乎

嘉祐元年丙申先生年二十一舉進士按鳳鳴驛記云
始余丙申歲舉進士過扶風求舍於館人不可而出次
於逆旅

二年丁酉先生二十二赴試禮部按先生作興國六祖
畫贊云余嘉祐初舉進士館於興國浴室院時歐陽文
忠公考試得先生刑賞忠厚之至論以為異人欲冠多
士疑曾子固所為子固文忠門下士也乃寘第二復以

春秋對義居第一及殿試章衡榜中進士乙科又按先生作太息一篇送秦少章歸京云昔吾舉進士試名於禮部歐陽文忠公見吾文且曰此吾輩人也吾當避之是年四月丁太夫人武陽君程氏憂按司馬溫公作程夫人墓志云夫人以嘉祐二年四月癸丑終於鄉里四年己亥先生年二十四服除十二月侍老蘇舟行適楚按先生南行前集序云己亥之歲侍行適楚舟中無事雜然有觸於中而發於詠歎蓋家君之作與弟轍之

文皆在焉因謂之南行集

五年庚子先生年二十五授河南府福建縣主簿有新
渠詩其序云庚子正月予過唐州太守趙侯始復三陂
疏召渠為新渠詩五章以告於道路致侯之意

六年辛丑先生年二十六應中制科入第三等有應制
科上兩制書及上富丞相書又有謝應中制科啟授大
理評事鳳翔府簽判按先生有感舊詩序云嘉祐中予
與子由奉制策寓居懷遠驛時年二十六子由年二十三

是年十二月赴鳳翔任與子由別

七年壬寅先生年二十七宦於鳳翔二月有詔郡吏分往屬縣決囚作詩五百言寄子由

八年癸卯先生年二十八宦於鳳翔作思治論

英宗皇帝治平元年甲辰先生年二十九宦於鳳翔

二年乙巳先生年三十自鳳翔罷任按子由作先生墓

志銘云治平二年罷還判登聞鼓院英宗皇帝在藩邸

聞先生名欲以唐故事召入翰林宰相限以近例召試

秘閣皆入三等得直史館是年通義郡君王氏卒於京師

三年丙午先生年三十一在京師直史館丁老蘇憂扶護歸蜀按歐陽文忠公作老蘇墓志云明允太常因革禮書一百卷書成方奏未報而卒英宗皇帝聞而傷之命有司具舟載其喪歸葬於蜀

四年丁未先生年三十二居服制以八月壬辰葬老蘇于眉州

神宗皇帝熙寧元年戊申先生年三十三免喪按四菩薩閣記云載四菩薩版以歸既免喪嘗與往來浮屠人勸某為先君捨施為大閣以藏之作記乃熙寧元年十月

二年己酉先生年三十四還朝監官告院按烏臺詩話云熙寧二年某在京授差遣與王詵寫詩賦及蓮華經三年庚戌先生年三十五監官告院有送章子評詩其序云熙寧三年子平自右司諫直集賢院出牧鄭州賦

詩餞之烏臺詩話云舊例館閣補外同舍餞送必分韻
是年范景仁嘗舉先生充諫官

四年辛亥先生年三十六任監官告院兼判尚書祠部
王荆公欲變科舉上使兩制三館議之先生獻三言荆
公之黨不悅命攝開封府推官有奏罷買燈疏御史知
雜事誣奏先生過失先生不辯乞外任避之除通判杭
州有赴任過揚州與劉貢父孫巨源劉莘老相聚數月
用逐人字作詩十一月到任有初到杭州寄子由兩絕

五年壬子先生年三十七在杭州是歲有牡丹記其序
云熙寧五年三月二十三日余從太守沈公觀花於吉
祥寺是年科場先生監試八月十七日登望湖樓是日
榜出有送杭州進士詩序云熙寧五年錢塘之士貢於
禮部者九人十月乙酉宴於中和堂作是詩以勉之十
二日運司差先生往湖州相度堤圩利害與湖州太守
孫莘老相見有贈莘老七絕臘月游孤山訪惠勤惠思
二僧

六年癸丑先生年三十八在杭州有八月十五觀湖詩
寫於安濟亭上及作仁宗皇帝飛白記其畧云熙寧六
年冬以事至姑蘇安簡王公子誨出所賜公端敏二字
又有作錢塘六井記其畧云熙寧五年太守陳公述古
至問民之利病明年春六井畢修故詳其語以告後人
運司又差先生往潤州道出秀州錢安道送茶和詩
七年甲寅先生年三十九在杭州正月游風水洞推官
李泌先行三日畱風水洞相待有詩題壁是年納侍妾

朝雲墓志云朝雲姓王氏錢塘人事先生二十有三年
來事先生方十二歲先生以子由在濟南求為東州守
按子由超然臺賦序云子瞻通守餘杭三年不得代以
轍之在濟南也求為東州守既得請高密五月乃有移
知密州之命則通判杭已四載矣按先生辛未別天竺
觀音詩序云予昔通守錢唐移蒞膠西以九月二十日
來別南北山道友又按先生記游松江說云吾昔自杭
移高密與楊元素同舟而陳令舉張子野皆從余過李

公擇於湖遂與劉孝叔俱至松江夜半月出置酒垂虹亭上子野年八十五以歌詞聞於天下作定風波令及道過常州為錢公輔作哀辭又有與段屯田詩云龍鍾三十九勞生已強半歲暮日斜時還為昔人歎是年又有師子屏風贊云潤州甘露寺有唐李衛公所留陸探微畫師子版余自錢塘移守膠西過而觀焉是年先生在潤州道上過除夜有潤州道上過除夜兩絕

八年乙卯先生年四十到密州任有上韓丞相論災傷

書到任二十餘日又論密州鹽稅又作後杞菊賦其序云仕宦十有九年家日益貧移守膠西齋厨索然

九年丙辰先生年四十一在密州作刻秦篆記云熙寧九年丙辰蜀人蘇某來守高密是年中秋歡飲達旦作水調歌頭懷子由及作薄薄酒二章

十年丁巳先生年四十二在密州就差知河中府已而改知徐州四月赴徐州任按子由作先生墓志云自密徙徐與子由相會於澶濮之間相約赴彭城留百餘日

宿於逍遙堂子由有兩絕先生和之徐州水患大作七月十七日河決澶州曹村八月二十一日及徐州城下先生治水有功至十月五日水漸退城以全朝廷降詔獎諭作河復詩

元豐元年戊午先生年四十三在徐州任適值春旱徐州城東二十里有石潭置虎頭其中可致雷雨作起伏龍行是年三月始識王迴子高聞與仙人周瑤英遊作芙蓉城詩二月有旨賜錢二千四百一十萬起夫四千

二十三人及發常平錢米改築徐州外小城創大岸四
以獎諭敕記併刻諸石為熙寧防河錄云迺即徐州城
之東門為大樓堊以黃土名之曰黃樓以土實勝水故
也子由作黃樓賦先生跋云元豐元年八月癸丑樓成
九月庚辰大合樂以落之又有中秋月三首云六年逢
此月五年照離別先生注云中秋有月凡六年矣惟去
歲與子由會於此

二年己未先生年四十四在徐州正月己亥同畢仲孫

舒煥八人游泗水上登石室使道士戴日祥鼓雷氏琴
先生有記按玉局文云僕在徐州王子立子敏皆館於
官舍而蜀人張師厚來過二王方年少吹洞簫飲酒杏
花下三月自徐州移知湖州按先生作張氏園亭記云
余自彭城移守吳興由宋登舟三宿而至是年四月二
十九日到湖州任王子立子敏皆從先生作子立墓志
云子立子敏皆從余學於吳興學道日進東南之士稱
之是歲言事者以先生湖州到任謝表以為謗七月二

十八日中使皇甫遵到湖州追攝按子立墓志云予得罪於吳興親戚故人皆驚散獨兩王子不去送予出郊曰死生禍福天也公其如天何返取予家致之南都又按先生上文潞公書云某始就逮赴獄有一子稍長徒步相隨其餘守舍皆婦女幼稚至宿州御史符下就家取書州郡望風遣吏發卒圍船搜取長幼幾怖死既去婦女恚罵曰是好著書書成何所得而怖我如此悉取焚之十二月二十日聞太皇太后升遐吏以其罪人不

許成服欲哭則不可欲泣則不敢作挽詩二首已而獄具十二月二十九日責授黃州團練副使本州安置是年子由聞先生下獄上書乞以見任官職贖先生罪責筠州酒稅出獄再次寄子由二詩韻有百日歸期恰及春之句先生自八月坐獄至是踰百日矣

三年庚申先生年四十五責黃州自京師道出陳州子由自南郡來陳相見三日而別乃正月十四日也至十八日蔡州道上遇雪有次子由韻古詩二首過新息縣

有示鄉人任師中一首任伋字師中眉州人嘗倅黃州
卜居新息故先生以詩示之至岐亭訪故人陳慥季常
為留五日賦詩一首而去乃以二月一日至黃州寓居
定惠院按先生別王文甫子辯云僕以元豐三年二月
一日到黃州家在南都獨與兒子邁來是年五月子由
來齊安先生有曉至巴河迎子由詩乃與子由同游武
昌西山寒溪寺定惠有海棠一株土人不知貴先生作
詩有也知造物有深意故遣佳人在幽谷之句接近日

黃州東坡圖云先生寓居定惠未久以是春遷臨臯亭先生復就臨臯亭立南堂至八月先生乳母任氏卒於臨臯亭葬於黃岡按先生上文潞公書云到黃州無所用心覃思易論語若有所得由是言之先生到黃定居之後卽作易傳九卷論語五卷矣

四年辛酉先生年四十六在黃州居臨臯亭正月往岐亭訪陳季常路獲一鑑有鑑銘云元豐四年正月余自齊安往岐亭泛舟而還過古黃州獲一鑑周尺有二寸

東坡八首序云余至黃二年日以困匱故人馬正卿哀予乏食於郡請故營地使躬耕其中今以東坡圖考之辛酉方營東坡次年壬戌始築雪堂故贈孔毅甫詩云去年東坡拾瓦礫今年削草葢雪堂是也

五年壬戌先生年四十七在黃州寓居臨臯亭就東坡築雪堂號東坡居士自黃州城南至雪堂四百三十步雪堂記云蘇子得廢圃於東坡之脇號其居曰雪堂以大雪中為之因繪雪於四壁之間間無容隙其名起於

此先生又自書東坡雪堂四字扁之堂前有細柳有浚井西有微泉堂之下有大冶長老桃花茶巢元修菜何氏叢橘種杭稔蔣棗栗有松期為可斷種麥以為奇事作陂塘植黃桑皆足以供先生之歲用為雪堂之勝景又以長短句擬斜川觀云元豐壬戌之春予躬耕東坡築雪堂以居南挹西望亭之後西控北山之微泉慨然而歎此亦斜川之游也是年三月先生以事至蘄水有春夜行蘄水過酒家飲酒乘月至一橋上曲肱少休作

西江月詞又游蘄水清泉寺作浣溪沙詞又作寒食詩
二首云自我來黃州已見三寒食太守徐君猷分新火
先生有詩謝之云臨臯亭中一危坐三見清明改新火
七月遊赤壁有赤壁賦十月又遊有後赤壁賦云十月
之望蘇子步自雪堂將歸於臨臯則壬戌之冬未遷而
先生以甲子六月過汝則居雪堂止年餘耳

六年癸亥先生年四十八在黃州為通判孟亨之跋子
由君子泉銘又有記承天夜游云元豐六年十月十二

夜解衣欲睡月色入戶欣然起行念無與樂者遂步至承天寺尋張懷民懷民亦未睡相與步於庭中庭中如積水空明水中藻荇交橫蓋竹柏影也何夜無月何處無竹柏但少閒人如吾兩人耳又夢中作祭春牛文云元豐六年十一月二十七日天欲明夢數吏人持紙請祭春牛文予取筆疾書其上

七年甲子先生年四十九在黃州二月與徐得之參寥子步自雪堂至乾明寺有師中庵題名文有記定惠寺

海棠說四月乃有量移汝州之命則先生居黃五載矣
按先生長短句滿庭芳序云四月一日余將自黃移汝
留別雪堂隣里二三君子李仲覽來書以遺之詞中有
坐見黃州再閏之句按東坡圖云郡人潘邠老及弟大
觀俱以詩知名從先生游先生去以雪堂付之邠老因
居焉黃州送先生者皆至慈湖陳季常獨至九江既到
江州因游廬山有記游廬山說云僕初入廬山山谷奇
秀平生所欲見應接不暇不欲作詩已而山中僧俗皆

曰蘇子瞻來矣不覺作一絕入開先寺主僧求詩作瀑布一絕往來十餘日作漱玉亭三峽橋詩與總老同游西林有贈總老及題西林壁皆絕句也又有寫寶蓋頌與僊長老其序云圓通禪院先君舊游也四月二十四日晚至宿焉明日先君忌日寫寶蓋頌以贈長老僊公蓋先生端午已在筠州計程必作宮師忌日之後即為高安之行按跋李志中文云元豐七年某舟行赴汝乃自富川陸走高安別家弟子由以冷齋夜話考之子由

在筠州雲菴居洞山聰禪師亦蜀人居壽聖寺一夕三人同夢迎五祖戒和尚拊手大笑曰世間果有同夢者異哉久之東坡書至曰已至奉新旦夕相見三人同出二十里建山寺而東坡至各追繹所夢坡曰某年七八歲時嘗夢某身是僧往來陝右雲菴驚曰戒禪師陝右人也暮年棄五祖來游高安終於大愚逆數蓋五十年而坡時正年四十九在筠州為留十日七月過金陵有與葉致遠唱和詩途中又有送沈遠赴廣南詩云嗟我

與君皆丙子四十九年窮不死又云我方北渡脫重江
君復南行輕萬里逼歲到泗州十二月十八日浴雍熙
塔下作如夢令兩闋又作滿庭芳與劉元達序云予年
十七與仲達往來於眉山四十九相逢於泗上晦日同
遊南山話舊感歎又有謝黃師是除夜送屠酥酒詩先生
上表乞於常州居住其畧云今雖已至泗州而費用罄
竭見一面前去南京聽候朝旨又考騾馱驛試筆云正
月四日離泗州則是除夜在泗州明矣

八年乙丑先生年五十按大全集雜說騾馱驛試筆云
今日離泗州然吾方上書求居常州及到南京有放歸
陽羨之命遂居常五月內復朝奉郎知登州再過密州
到郡五日以禮部郎召到省半月除起居舍人在登州
有海市詩又有別登州舉人詩有休嫌五日忽忽守之
句

哲宗皇帝元祐元年丙寅先生年五十一以七品服入
侍延和改賜銀緋尋除中書舍人按志林云元祐元年

余為中書舍人復遷翰林學士知制誥任中書舍人日
舉江寧府司理周種充學官及除內翰又有舉魯直自
代狀

二年丁卯先生年五十二為翰林學士復除侍讀有作
興國寺六祖畫贊

三年戊辰先生年五十三任翰林學士有和子由元日
省宿致齋白髮蒼顏五十三之句是年省試先生知貢
舉開院日有與李方叔詩序云僕與李廌方叔相知久

矣僕領貢舉事李不得第愧甚作詩謝之又充館伴北使按先生與陳傳道書云某頃伴虜使頗能頌某文四年己巳先生年五十四任翰林學士三月內累章請郡除龍圖閣學士知杭州按子由作先生墓志云宣仁心善先生辯蔡持正之謗出郊遣內侍賜龍茶銀合用前執政恩例先生以七月三日到杭州任謝表云江山故國所至如歸父老遺民與臣相問到任有謁文宣王廟祝文云昔自太史通守是邦今由禁林出使浙右又

有謁諸廟祝文先生之帥杭也替林子中故先生和子
中詩有江邊遺愛啼斑白之句是歲子由使契丹先生
有詩送之有單于若問君家世莫道中朝第一人及先
生出牧餘杭子由代為學士

五年庚午先生年五十五在杭州任有論西湖狀及論
高麗公案

六年辛未先生年五十六在杭州被召則在杭不過二
載也先生之被召也林子中復來替先生是以先生與

子中啟有適相先後之說既到京師除翰林承旨復侍
邇英按子由所作潁濱遺老傳云先生召還本除吏部
尚書復以臣故改翰林承旨臣之私意元不遑安乞寢
臣新命與兄同脩從官不報侯鯖錄云先生元祐中再
召入院作承旨乃益舊擬作衣帶馬表云枯羸之質匪
伊垂之帶有餘歛退之心非敢後也馬不進數月以弟
嫌請郡復以舊職知潁州按先生懷舊別子由詩云元
祐六年予自杭州召還寓居子由東府數月復出領汝

陰時予年五十有六矣到潁未幾公帑已竭齋厨索然
戲作數句侯鯖錄云元祐六年冬汝陰久雪人饑一日
天未明先生簡召議事曰某一夕不寐念潁人之饑欲
出百餘千造炊餅救之老妻謂某曰子昨過陳見傅欽
之言簽判在陳賑濟有功不問其賑濟之法某遂相招
令時面議曰已脩矣今細民之困不過食與火耳義倉
之積穀數千石便可支散以救下民作院有炭數萬秤
酒務有柴數十萬秤依元價賣之可濟中民先生曰吾

事濟矣遂草放積欠賑濟奏又奏乞罷黃河夫萬人開
本州溝瀆從之

七年壬申先生年五十七在潁州按侯鯖錄云元祐七
年正月東坡在汝陰州堂前梅花大開月色鮮霽王夫
人曰春月色勝如秋月色秋月令人慘悽春月令人和
悅何如召趙德麟輩來飲此花下先生大喜曰吾不知
子亦能詩此真詩家語耳遂召與飲先生用是語作減
字木蘭花有不是秋光只與離人照斷腸之句已而改

知揚州先生之在頴也與趙德麟同治西湖未幾有維
揚之命三月十六日湖成德麟有詩見懷先生次韻又
再和之冷齋夜話云東坡鎮維揚幕下皆奇豪一日石
塔長老求解院歸西湖坡與僚佐袖中出疏使鼃無咎
讀之其詞有為東坡而少留之句已而以兵部尚書召
復兼侍讀是年南郊先生為鹵簿使尋遷禮部尚書遷
端明侍讀學士有讀朱暉傳題文潛語後及作醉翁操
任兵部尚書日有薦趙德麟狀

八年癸酉先生年五十八任端明侍讀二學士是年先生繼室同安郡君王氏卒於京師按先生作西方阿彌陀贊序云蘇某之妻王氏元祐八年八月一日卒於京師謹按先生初娶通義郡君王氏乃同安之堂姊也先生祭王君錫丈人云某始婚姻公之猶子允有令德天閼莫遂惟公幼女嗣執壘篚由是推之通義為同安之堂姊明矣又有八月二十七日建隆章淨館成一絕有坐待宮人畫詔回之句復以二學士出知定州九月十

四日東府雨中作示子由云去年秋雨時我在廣陵歸
今年中山去白首歸無期蓋定州之除在九月內到定
州任則有祭韓魏公之文

紹聖元年甲戌先生年五十九知定州就任落兩職追
一官知英州有辭宣聖文行至南康軍再貶寧遠軍節
度副使惠州安置過虔州有記真君籤說云八月二十
一日過虔州與王巖翁同謁祥符宮又有初入贛州作
又有題天竺樂天石刻云予年幼時先君自虔州歸言

天竺有樂天詩今四十七年矣是年十月三日到惠州
寓居嘉祐寺十二日與幼子過同游白水佛迹浴於湯
池又按長短句浣溪沙序云紹聖元年十月十三日與
程鄉令侯晉叔歸善簿覃汲游大雲寺野飲松下設松
黃湯作此闕余家近釀酒名萬家春時有虔州鶴田處
士王原子直不遠千里來訪留七十日乃去至十一月
有戲贈朝雲詩又有與吳秀才書吳乃子野之子其書
云過廣州買得沉檀數斤定居之後杜門燒香深念五

十九歲之非矣

二年乙亥先生年六十在惠州有惠州上元夜詩云去年中山府老病亦宵興今年江海上雲房寄山僧以歲月考之去年甲戌上元先生知定州今歲乙亥寓嘉祐僧舍故有雲房寄山僧之句是年遷居於合江亭以先生別王子直語觀之紹聖元年十月三日始至惠州寓於嘉祐寺明年遷於合江之行館得江樓豁徹之觀忘幽谷窈窕之趣三月四日同太守詹範器之等同游白

水山又有與陳季常書云到惠州將半年矣

三年丙子先生年六十一在惠州有和陶淵明移居詩云予去歲三月自水東嘉祐寺遷去合江樓迨今一年得歸善後隙地數畝父老云古白鶴觀基也意欣然居之營白鶴新居始於是矣當年惠州修東西新橋先生助以犀帶而子由亦以史夫人願入內所賜金錢數千為助及橋成日先生有詩落之又有曇秀道人來訪先生而先生題其詩卷云予在廣陵曇秀作詩予和之後

五年曇秀來惠州見予時吳遠遊陸道士亦客於先生
歲暮以無酒為歎七月朝雲卒先生有悼朝雲詩及墓
志又於惠州栖禪寺大聖塔葬處作六如亭覆之

四年丁丑先生年六十二在惠州按先生與張天和長
官書云賤累閏月初可到又云承問賤累正月末已到
贛上矣閏月上旬可到此也又按先生丙子年與毛澤
民書云長子授韶州仁化令中冬當挈家至此某買得
數畝地在白鶴峰上已令斫木陶瓦作屋二十間以此

考之先生長子自冬挈家至閏二月方到惠州五月先生謫授瓊州別駕昌化軍安置則五十九歲客惠州至是六十二歲又過海也按志林云余在惠州忽被命謫儋耳太守方子容自携告身來弔余曰此故前定吾妻沈事僧伽甚誠一夕夢和尚來辭云當與蘇子瞻同行後七十二日有命今適七十二日矣豈非前定乎遂寄家惠州獨與幼子過渡海按先生和淵明移居詩序云丁丑歲余謫海南子由亦謫雷州五月十一日相遇於

藤同行至雷六月十一日相別渡海時余病痔呻吟子
由亦終夕不寐因誦淵明詩勸余止酒乃和元韻因以
贈別庶幾真止矣又與楊濟父云獨與幼子過南來餘
皆留惠州生事狼狽勞苦萬狀然胸中亦自有翛然處
也今日到海岸地名遞角場明日順風即過瓊矣卓吾
子曰此數語坡公自畫過海圖也傷哉傷哉到儋州有
儋州謝表按子由作先生墓志云紹聖四年先生安置
昌化初僦官屋以庇風雨有司猶謂不可則買地築室

昌化士人畚土運甃以助之為屋三間又按先生與程全父推官書云初至僦官屋數椽近復遭迫逐不免買地結茆又按先生與陳儒書云近與兒子結茆數椽居之勞費不貲矣賴十數學者助作躬泥水之役又云新居在軍城南極湫隘然則先生居在軍城南隣於天慶觀先生天慶觀乳泉賦云吾索居僦耳卜築城南隣於司命之宮是也又有枕柳菴銘云東坡居士謫居僦耳無地可居偃息枕柳林中摘葉書銘以記其處

元符元年戊寅先生年六十三在儋州九月四日遊天
慶觀有信道法智說是年吳子野來訪先生先生以詩
贈之其序云去歲與子野遊逍遙堂因往山西叩羅浮
道院宿於西堂今歲索居儋耳子野復來相見又有記
筮卦云戊寅十月五日久不得子由書憂不去心以周
易筮之得渙六三又有記諸說云海南以諸為糧幾米
之十六今歲諸不熟以客舶方至市有米也

二年己卯先生年六十四在儋州時久旱無雨陰翳未

快至上元夜老書生數人相過曰良月佳夜先生能一
出乎先生欣然從之步城西入僧舍歷小巷民夷雜揉
屠沽紛然歸舍已三鼓矣歸錄其事為己卯夜書是歲
閏九月有瓊州進士姜君弼唐佐來儋耳從先生學有
與姜唐簡云已取天慶觀乳泉潑建茶之精者念非君
莫與共之

三年庚辰先生年六十五在儋州上元日和戊寅違字
韻詩題後云戊寅上元余在儋耳過子夜出守舍作違

字韻詩今庚辰上元已再期矣家在惠州白鶴峯下過
子并婦從余來此五月大赦量移廉州安置先生在儋
食芋飲水作書傳以推明上古之絕學嘗與軍使張中
同訪黎子雲欲醵錢作屋名曰載酒堂又嘗上巳日尋
諸生皆出獨與老符秀才飲又嘗用過韻與諸生冬至
飲酒有愁顏解符老壽耳闕吳公之句注云符吳皆坐
客必老符秀才與吳子野也又嘗以詩紀春夢婆侯鯖
云東坡老人在昌化嘗負大瓢行歌田畝間所歌者皆

哨遍也。饁婦年七十云。內翰昔日富貴一場春夢矣。里人因呼此媼為春夢婆。一日被酒獨行。遍至子雲諸黎之舍。作詩云。符老風流可奈何。朱顏減盡鬢絲多。投梭每困東隣女。換扇惟逢春夢婆。凡此數者。皆先生海外逸事。六月過瓊州。作惠通泉記。遂渡海。有烏喙詩序云。余來儋耳。得犬曰烏喙。予遷合浦。過澄邁。汨而濟。戲作是詩。渡海到廉州。有謝表。又有與鄭靖老書云。到廉廉守云。公已行矣。志林未成草。得書傳十三卷。某留此過。

中秋或至月末乃行作木筏下水歷容藤至梧與邁約
般家至梧相會是歲又有移永州之命按先生謝提舉
成都府玉局觀表云先自昌化貶所移廉州又自廉州
移舒州節度副使永州居住移至英州復朝奉郎提舉
成都府玉局觀任便居住經由廣州有將至廣州用過
字韻寄迨邁二子詩時朱行中舍人知廣州又吳子野
何崇道穎堂通三長老黃明達李公弼林子中自番禺
追餞至清遠峽同遊廣陵寺乃元符三年十一月十五

日自此舟行清遠見顧秀才談惠州之美過英州拜玉
局之除過韶州有次韻狄守李倅詩是年過嶺作詩二
首寄子由有七年來往我何堪之語蓋先生甲戌謫惠
州已而過海至是為七年矣次年正月五日過南安軍
計先生渡嶺必是歲除

建中靖國元年辛巳先生年六十六度嶺北歸作南華
長老題名記按題中載石鐘山記云建中靖國元年正
月五日自南陵還過南安軍舊法掾吳君示舊所作石

鐘山銘為題其末乃知先生首正過南安也正月到虔
州有與錢濟明詩云某已到虔州二月十日方離此及
發虔州過吉州永和鎮清都觀有謝道士自言丙子生
求詩為賦一首又為作贊并寫清都臺三字中途又為
南安軍作學記寫海外所作天慶觀乳泉賦四月舟行
至豫章彭蠡之間遇成國程夫人忌日乃寫圓通偈云
行當施廬山有道者又有與胡仁修書云旦夕到儀真
暫令邁一至常五月行至真州瘴毒大作病暴下中止

於常州按先生寄朱行中詩有至今不貪寶凜然照塵
寰之句先生注云前一日夢中作此詩寄行中覺而記
之自不曉按近日曾端伯百家詩選志朱行中事迹云
東坡夢中寄朱行中一篇南遷絕筆也嗟乎先生之文
如萬斛泉源而乃止於夢中寄行中之作惜哉六月上
表請老以本官致仕七月丁亥卒於常州實七月二十
八日是為徽宗登極之元年辛巳云按子由作先生墓
志云先生七月被病卒於毘陵吳越之民相與哭於市

其君子相與弔於家訃聞於四方無賢愚皆咨嗟出涕
太學之士數百人相率飯僧惠林佛舍嗚呼先生文章
為百世之師而忠義尤為天下大閑加之好賢樂善常
若不及是宜訃聞之日士民惜哲人之萎朝野嗟一鑑
之逝皆出於自然不可強而致也以次年閏六月葬於
汝州郟城縣釣臺鄉上瑞里

年譜後語

東坡守膠西時熙寧乙卯也仕宦十九年家日益貧元

豐己未於吳興被逮赴獄黃州安置寓居定惠寺遷臨
臯亭就亭立南堂辛酉在黃二年以困匱故人馬正卿
為請故營地使躬耕其中所謂東坡者也明年始就東
坡築雪堂以居紹聖甲戌寧遠軍之謫惠州安置寓居
嘉祐寺就寺立思無邪齋明年遷於合江之行館又明
年得歸善後隙地數畝營白鶴新居丁丑新居成未幾
謫瓊州於昌化軍安置初僦官屋為有司迫逐乃買地
城南結茆數椽鄰天慶觀極湫隘嘗偃息枕椰林中摘

葉書銘以記其處在僖四年食芋飲水其窮甚矣元符
庚辰得赦北歸明年為建中靖國辛巳七月丁亥卒於
毘陵坡公涉世多難如此徐杭汝潁牧守之樂中書翰
林侍從之榮定州方面之貴所得幾何而四十五年間
南北奔走風波瘴癘之鄉饑餓勞苦曾不得一廛環堵
為終老地是故余讀王宗稷所為先生年譜深感於心
因述方氏所記并春渚紀聞以補年譜之遺云

燕石齋

本傳

安石用事上欲用軾修中書條例安石曰軾與臣所學
皆異別試以事可也上又欲用軾起居注安石曰軾非
是可獎之人乃寘軾官告院四年安石欲變更科舉使
兩制三館議之上得蘇軾議乃止即日召見問政軾曰
臣竊意陛下求治太急聽言太廣進人太銳願陛下安
靜以待物之來然後應之上竦然初策進士舉子希合
爭言祖宗法制非是軾為考官退擬答以進安石愈恨
軾乃乞外通判杭州自杭徙密密有盜未獲安撫司遣

使臣領悍卒入境捕盜卒凶暴反以禁物誣民強入人家爭鬪至殺民訴於軾軾投其書不視曰必不至此悍卒聞之頗用自安不知軾已使人招出戮之矣自密徙徐時河決曹邨滙於城下富民爭出避水軾曰吾在是水決不至壞城驅使復入而自杖策入武衛營呼其卒長告之曰事急矣雖禁卒且為我盡力卒長應曰太守不避塗潦吾儕小人敢不效命乃率其徒短衣徒跣持畚鍤以出築東南長堤首起戲馬臺尾屬於城民乃安

徙知湖州以表謝上言事者撻其語以為謗逮赴御史
獄初軾既補外見有事不便者頗托事以諷御史舒亶
言蘇軾作為歌詩譏切時事陛下發錢以業貧民則曰
羸得兒童語音好一年強半在城中陛下明法以課試
羣吏則曰讀書萬卷不讀律致君堯舜終無術陛下興
水利則曰東海若知明主意應教斥鹵變桑田陛下謹
鹽禁則曰豈是聞韶解忘味爾來三月食無鹽宰臣王
珪亦言蘇軾不臣因舉軾咏檜詩曰根到九泉無曲處

世間惟有蟄龍知陛下飛龍在天而軾求之地下之蟄
龍其不臣如此上曰彼是詠檜何預朕意張方平范鎮
上書救之直舍人院王安禮乘間進曰自古大度之君
不以語言謫人願陛下無竟其獄上曰朕固不深譴特
欲申言者路耳遂以黃州團練副使安置軾幅巾芒屨
與田父野老時時相從築室東坡自號東坡居士五年
神宗語宰相王珪蔡確曰國史至重可命蘇軾成之珪
有難色神宗曰軾不可姑用曾鞏鞏進太祖總論神宗

竟不允遂手札移軾汝州軾未至汝上書自言有田在常願得移居奏入報可過金陵見王安石曰大兵大獄乃漢唐滅亡之兆公獨無一言可乎曰二事皆惠卿啟之安石身在外又安敢言軾曰在朝則言在外則不言此事君之常禮耳上之待公本非常禮公所以事上豈可以常禮自處耶安石乃厲聲曰某須說又曰人須知行一不義殺一不辜得天下弗為乃可軾戲答曰今之君子爭減半年磨勘雖殺人亦為之矣至常以哲宗即

位復朝奉郎知登州召為禮部郎中軾舊善門下侍郎
司馬光及知樞密院章惇惇每以謔侮困光光苦之軾
見惇曰司馬君實時望甚重昔許靖以虛名見鄙於蜀
先主法正曰靖之浮譽播流四海若不加禮必以賤賢
為累先主納之夫許靖且不可慢况君實乎元祐二年
遷中書舍人時光方議改免役為差役差役行於祖宗
之世法久多弊編戶充役不習官府吏虐使之多以破
產而狹鄉之民或有不得休息者先帝知其然故為免

役使民以戶高下出錢而無執役之苦行法者不循上
意於雇役實費之外取錢過多民遂以病光知免役之
害而不知其利欲一切以差役代之方差官置局軾與
其選獨以實告嘗見光政事堂條陳不可狀光忿然不
樂軾曰昔韓魏公刺陝西義勇公為諫官爭之甚力魏
公不樂公亦不顧軾昔聞公道其詳豈今日作相不許
軾盡言耶尋除翰林學士二年復除侍讀嘗召入對便
殿宣仁后問曰卿前為何官曰臣為常州團練副使今

為何官曰臣今待罪翰林學士后曰何以至此曰遭遇
太皇太后皇帝陛下曰非也豈大臣論薦乎曰亦非軾
驚曰臣雖無狀不敢由他途以進后曰此先帝意也先
帝每誦卿文章必歎曰奇才奇才但未及進用卿耳軾
不覺失聲宣仁后與哲宗亦泣左右皆感涕已而命坐
賜茶徹御前金蓮燭送歸院三年權知禮部貢舉嘗侍
上讀祖宗寶訓因及時事當軸者恨之四年復出知杭
州杭本近海水泉鹹苦唐刺史李泌始引西湖水作六

井民足於水故井邑日富及白居易復浚西湖放水入運河自河入田所溉至千頃自唐及錢氏歲輒開治放湖水足用至宋廢而不理湖中葑積為田一十五萬餘丈而水無幾矣運河失湖水之利則取給於江潮潮渾濁多淤河行闌闌中三年一淘為市井大患而六井亦幾廢軾始至浚茅山鹽橋二河以茅山一河專受江潮鹽橋一河專受湖水復造堰閘以為湖水蓄洩之限然後潮不入市且以餘力復完六井民稍獲其利矣又間

至湖上周視良久曰今欲去葑田將安所寘之湖南北
三十里環湖往來終日不達若取葑田積為長堤以通
南北則葑田去而行者便矣又吳人種菱春輒芟除不
遺寸草葑田若去募人種菱收其利以便修湖可也乃
取救荒之餘得錢數萬貫糧數萬石復請於朝得百僧
度牒以募役者堤成植芙蓉其上望之如雲錦杭人名
之曰蘇公堤焉軾二十年再蒞此州有德於其人以故
家有畫像飲食必祝六年召入為翰林承旨復侍邇英

時三黨之論起矣御史復攻軾軾懼乃復請外出守潁州七年徙揚州未閱歲以兵部尚書召還尋遷禮部復兼二學士至是又復乞一郡自効八年知定州紹聖元年軾坐為中書舍人日草呂惠卿降官制云均輸之政自同於商賈手實之禍下及於雞豚先皇帝始以帝堯之仁姑試伯鯨終焉孔子之聖不信宰予言者誣以謗訕復謫知英州安置惠州軾以少子過自隨居三年復以瓊州別駕安置昌化軾初至僦官屋以居有司猶謂

不可乃買地築室昌化士人畚土運甓以助軾元符三年大赦北還將居許病暑暴下乃止於常建中靖國元年六月軾病遂不起葬於汝州郟城縣軾初好賈誼陸贄書既而讀莊子喟然歎息曰吾昔有見於中口未能言今見莊子得吾心矣嘗自謂作文如行雲流水初無定質但常行於所當行止於所不可不止故雖嬉笑怒罵之辭皆可書而誦也洵晚歲讀易作易傳未究疾革命軾述其志卒以成書復作論語說最後居海南作書

傳既成三書撫之歎曰今世要未能信後有君子當知我矣高宗即位贈資政殿學士以其孫符為禮部尚書又以其文寘左右初畢仲游舉進士召試學士院蘇軾異其文擢為第一仲游因貽書與軾曰言語之累不特口出者為是其形於詩歌賦頌託於碑銘著於序記者皆是也今知畏於口而未畏於文是其所是則見是者喜非其所非則蒙非者怨喜者未能濟君之謀而怨者或已敗君之事矣官非諫臣職非御史而非是人所非

是殆猶抱石而救溺也仲游士安之孫仁宗初讀軾轍
制策退而喜曰朕今日為子孫得兩宰相矣或謂軾稍
自韜戢雖不獲柄用亦當免禍嗟夫假令軾以是而易
其所為尚得為軾哉



文章辨體彙選卷五百五十九